



QUÆSTIO MEDICA

CARDINALITIIS DISPUTATIONIBUS

MANE DISCUTIENDA

IN SCHOLIS MEDICORUM

Die Jovis 15. Martij.

M. JACOBO DE BOURGES,

DOCTORE MEDICO, PRÆSIDE.

An statim à cœna somnus?

I

LABORIS & somni necessarias vices dum dividit, salutariter componit, quotidiana interponendi cibi consuetudo. Horum trium, laboris, somni, & cibi, ut dissimilis facultas, sic dispar usus esse solet, & diversa cujusque usurpandi tempora, ex proprio vitæ instituto definienda, & ratò semper ordine obtinenda, si ad unam benè valendi rationem exigantur: opportunum inchoandi operis tempus, cum excusâ somni gravitate, & simul cum sole experrectis, nova oboritur alacritas sponte laborem occupans: hunc aliquandiu quidem perferre necesse est ei, qui optat suam sibi ad valetudinem prodesse industriam; ita jejunis, aut manè leviter pastis solidi diei labor innocens: largiore verò prandio institutum opus abrumpere mox retexendum, rem omnium insaluberrimam: ergo corporis pascendi differenda

hora, & fames ferendo obsonanda est. Optimum vivendi genus eorum, qui nihil aut parùm pransi, laborem & diem liberaliori cœnâ claudunt: dummodò ne ingestos cibos corrumpant intempestivè vigiles, sublatis dapibus, & remotâ mensâ statim secedant, quietem animo, otium corpori daturi. Ambo unâ acquiescere, & quiescendo adfuetum munus ut præstent denuò corroborari, summum & præcipuum somni beneficium est.

II.

MAGNA est hominum ab labore atque cibo ad somnum proclivitas, attamen ille sive longus, sive brevis, sive altus, sive levis, nunquam bis in die optandus, senibus etiam metuendus, quos sæpiùs sollicitat. Tanti sanorum interest somnum, ut profit, capere tempestivum: hunc autem tria faciunt, causa, locus, & tempus. Causa, naturæ ad somnum vocantis vis & consilium, apud nos, dum valemus, omnia ex æquo & bono agentis. Locus, in quo mollissimè composito corpore dormiturus jaceat, ἀπαλπέως ἀερίως: utram in aurem dormiat nihil refert: omnis juvat sanum decubitus cuicuiusmodi ille sit. Tunc verò dormiendi tempus instat, cùm exhaustis & quamprimùm instaurandis viribus, ne omninò fatiscant, apta adest materies quam cibus obtulit, quæque primis visceribus contenta, utiliter in his adornari & perfici sine somno nunquam potest.

III.

RERUM labore fessis quæ propior jam imminet somni imperiosa vis, si quando statim à cœna instet, huic ultrò occurrendum esse natura suadet: nam à somno, illa robur animumque ducit, & vires ingeminans, ad omnia intùs peragenda lætior accedit. Lautior cœna fuit, atque oblatos jam corpus tenet cibos, sed plures, sed crudos eò diutiùs futuros, & ideò cuius corruptelæ magis obnoxios, quò lentius coquuntur, procul ab eis avvocato calore, & sicut in vigilia mos est foris diversante. Ut primùm somnus advenit, calor intrò totus ad cibos redit, & nullum passus excidere vacuum coctionis tempus, primâ nec levi operâ, sic coquendos adoritur, ut cruditate positâ, confestim prodeat spiritus alimento insitus, & alendi corporis spiritibus σύγγενος,

qui unâ jundti promovere pares sunt perfectæ chylofeos artificium. Hinc demùm alius atque alius cœnæ & somni fructus, dum enim subitò cibi & caloris confluxu fervet coctionis opus, uberior ab alimentis humiditas erumpit, quâ vicina viscera perfundente, superstes laboris æstus restinguitur, incitati sanguinismotus comprimitur, atque calore eò meliùs accurante, quò citiùs conceptis cibis incubuerit, jam jam somnus affatim parauerit, unde diurna virium dispendia brevi reparari possint.

IV.

NON modò somnum tempestivum, quæ paulò ante præivit, cœna facit, sed etiam durabilem, & qualis ad consummatam coctionem tenendus, longum & altum: ubi enim calor cibos attingit, fursùm ab illis mittitur halitus crassiusculus, & quò recentioribus è cibis admittitur, eò minùs solubilis, quò mens & sensus obligati justum concedunt ad quiescendum spatium. Atqui hæc est vera & proxima naturalis somni causa, cætera quæ extrinsecùs adveniunt, somni incitamenta, quia brevem, quia levem, vel intempestivum, vel inutilem accersunt, & sæpè à rebus innoxiiis non innoxium. Quem cantûs suavitas, quem, frondium, strepitum modulantis favonii aura, aut lenè fluentis aquæ murmur otiosis auribus insusurrant, brevior & levior quàm reparandis viribus sit idoneus. Æstivo die & flammæ latrante caniculâ frigidiori in loco obdormiscere, vel jacentem fulciete rosâ, insidiosum est: item vacuò cibis corpore consopiri, aut consopitum ad mensam accumbere culpâ non vacat. Vis cubitum eò discedere, quò te lassum atque intra legem cœnatum legitimæ somni causæ provocant, nusquam omnes commodius unum in locum coitura, unus est statim à cœna ineundus lectulus, sed ut jucundus sit & ad virium instaurationem stratus, liber liberum adito.

V.

QUI somnum statim à cœna obrepentem eluctando vigilare annitur, parùm somni & vigiliæ in usu prudens, utrique impar, nec vigilantium agilitatem servat, nec dormientium tranquillitatem obtinet: at mox imperatæ sibi vigiliæ compos, quem longè dispulit, vel totam noctem

4
oculis suis somnum non videbit, vel serum capiet, & ut cœnam edormiat, brevem nimis: hinc frequens & inopina sobriorum crapula, hinc macies & febrium cohors, atque cætera, quæ cruditatem vigiliæ sobolem, hoc est, longum cœnæ & somni diffidium comitantur, symptomata: haud paulò quidem graviora, quàm quæ conceptus inter fercula, neque diu dissimulatus sopor intulerit; illa universum naturæ fundum depopulantur, caput petunt: hæc Medicus facili arte submovenda ei præstiterit, cujus cœnæ & somno præfuërit.

Ergo statim à cena somnus.

Asserebat LUTETIÆ MARCUS ANTONIUS HELLOT,
Parisinus, A. R. S. H. MDCLXXIV.

P A R I S I I S,

Ex Typographiâ FRANCISCI MUGUET, Regis ac Illust.
Archiepiscopi Typographi.